

俾强悍知所儆畏。如日久視爲具文、仍致有名無實，一經發覺，必將該督撫嚴懲不貸。”欽此。河南司通行

私製火藥尚未售賣被獲

廣東撫 咨：外結徒犯馮學周商同羅會全等，私製火藥，欲賣獲利。尚未售賣，卽被拏獲。將馮學周比照合成火藥賣與鹽徒擬軍例，量減一等，杖一百徒三年。嘉慶二十年案

囤積黑鉛比照私販焰硝治罪

雲撫 咨：外結徒犯王嵩囤積私鉛，例無治罪專條。惟黑鉛攸關軍火與硝黃無異。將王嵩比照囤積硝黃未曾興販者，減私販一等，於私販焰硝一百觔以上滿徒例，減一等，杖九十徒二年半。道光三年案

私販土硝提淨在五十觔以上

東撫 咨：外結徒犯陳全貴私販土硝二百八十七觔。經章邱縣提驗，內多泥土，必須製後方成焰硝。當卽提製，只得淨硝九十五觔，尚在一百觔以下。將陳全貴比照違制律杖一百量加一等，擬杖六十徒一年。嘉慶二十一年案

販硝三千餘觔比照私鹽擬軍

蘇撫 咨：周文貴糾同趙克禮等私販硝觔至三千七百觔之多。未便照尋常販硝一百觔以上例擬徒。應比照興販私鹽三千觔以上例，發附近充軍。嘉慶二十一年案